

Alþýðusamband Íslands

Tillögur að breytingum á lögum og reglugerðum fyrir ASÍ

Umræðuskjöl til undirbúnings 40. þingi ASÍ 2012



Alþýðusamband Íslands

Tillögur að breytingum á lögum og reglugerðum fyrir ASÍ

Samþykkt á fundi skipulags- og starfsháttanefndar ASÍ 30. maí 2012.

Lagðar fyrir miðstjórn ASÍ 13. júní 2012.

1. Breyting á 2. mgr. 5. gr.

2.mgr. hljóðar svo:

„Í lögum þessum merkir hugtakið aðildarsamtök öll félög einstakra sambanda og félög með beina aðild. Hugtakið aðildarfélög merkir öll félög einstakra sambanda og félög með beina aðild.“

Tillaga að nýrri 2. mgr.:

„Í lögum þessum merkir hugtakið aðildarsamtök, landssambönd, öll félög einstakra sambanda og félög með beina aðild. Hugtakið aðildarfélög merkir öll félög einstakra sambanda og félög með beina aðild.“

Greinargerð:

Við frágang laga ASÍ hefur orðið landssambönd fallið niður. Þetta sést glögglega þegar löggin eru lesin.

2. Breyting á 16. gr.

Greinin hljóðar svo:

„Heimilt skal aðildarfélagi að ákveða kjörtímabil stjórnar sinnar og trúnaðarmannaráðs tvö ár, en aðalfund skal halda árlega og þar flutt skýrsla stjórnar og lagðir fram og afgreiddir reikningar félagsins áritaðir af löggiltum endurskoðanda.

Aðalfundur skal haldinn innan 5 mánaða frá því að reikningsári lýkur. Hann skal boðaður með a.m.k. sjö sólarhringa fyrirvara.“

Tillaga að nýrri 16. gr.:

„Heimilt skal aðildarfélagi að ákveða kjörtímabil stjórnar sinnar og trúnaðarmannaráðs allt að fjögur ~~tvö~~ ár, en aðalfund skal halda árlega og þar flutt skýrsla stjórnar og lagðir fram og afgreiddir reikningar félagsins áritaðir af löggiltum endurskoðanda.

Aðalfundur skal haldinn innan 5 mánaða frá því að reikningsári lýkur. Hann skal boðaður með a.m.k. sjö sólarhringa fyrirvara.“

Greinargerð:

Tillagan er efnislega fram komin að frumkvæði VM - Félags vélstjóra og málmtæknimanna. Hún byggir á því að eðlilegt sé að ákvörðun um kjörtímabil stjórnar og trúnaðarráðs sé á valdi aðildarfélaganna innan eðlilegra marka. Benda má á í því sambandi að kjörtímabil t.d. til alþingis og sveitarstjórna er fjögur ár og engin umræða er um að það sé ólýðræðislegt fyrirkomulag. Ekki er þó reiknað með að aðildarfélögin fari í einhverjum mæli að breyta kjörtímabili stjórnar og trúnaðarmannaráða frá því sem nú er þrátt fyrir að lögum ASÍ verði breytt með þeim hætti sem hér er lagt til.

3. Breyting á 2. mgr. 19. gr.

2. mgr. hljóðar svo:

„Um starfsemi skrifstofunnar gildir reglugerð sem samþykkt er af sambandsþingi.“

Tillaga að nýrri 2. mgr.:

„Um starfsemi skrifstofunnar gildir reglugerð sem samþykkt er af ~~sambandsþingi~~ miðstjórn.“

Greinargerð:

Í 1. mgr. 19. gr. segir:

„Alþýðusambandið hefur aðsetur og skrifstofu sína í Reykjavík. ASÍ er stjórnað af miðstjórn sem kosin er á þann hátt sem lýst er í 33. gr.“

Með því að miðstjórn er falið það hlutverk að að bera ábyrgð á skrifstofu ASÍ og þar með daglegri starfsemi sambandsins verður að telja eðlilegt að ákvarðanir um skipulag starfsemi skrifstofunnar séu einnig á valdi miðstjórnar. Þar við bætist að þegar sambandsþing á tveggja ára fresti hafa tekið við af ársfundum getur bið eftir samþykki þingsins hamlað eðlilegum breytingum og framþróun í starfsemi skrifstofunnar.

Eðlilegt og rétt er að kynna framkomna tillögu að breyttri reglugerð á sambandsþinginu í haust og gefa þingfulltrúum tækifæri til að taka afstöðu til hennar óháð því hvort þessi tillaga verður samþykkt.

4. Breyting á heiti V. kafla og afleidda breytingar

Núverandi heiti:

„Þing og starfsemi ASÍ-UL“

Tillaga að nýju heiti:

„Þing og starfsemi ASÍ-UNG“

Jafnframt verði lögum ASÍ breytt þannig að þar sem nú stendur „ASÍ-UL“ í lögnum komi í staðinn „ASÍ-UNG“.

Greinargerð:

Tillaga um nýtt heiti á ungliðasamtökum ASÍ er sett fram að tillögu stjórnar ASÍ-UL.

5. Breyting á 2. mgr. 39. gr.

2. mgr. hljóðar svo:

„Til þess að tillaga teljist samþykkt á formannafundi þarf hún að hljóta einfaldan meirihluta atkvæða skv. 1. mgr. og atkvæði meirihluta þeirra formanna sem fundinn sækja.“

Tillaga að nýrri 2. mgr.:

„Til þess að tillaga teljist samþykkt á formannafundi þarf hún að hljóta einfaldan meirihluta atkvæða skv. 1. mgr. og atkvæði meirihluta þeirra ~~formanna~~ formanna-sem fundinn sækja.“

Greinargerð:

Í 1. mgr. segir:

„Formenn aðildarféлага og deilda sambandanna fara með atkvæðisrétt á formannafundum í samræmi við úthlutaðan fjölda fulltrúa hvers um sig á næstliðnu sambandsþingi. Í fjarveru

þeirra fara varaformenn aðildarfélaganna og deilda sambandanna með atkvæðisrétt á formannafundum. Miðstjórnarmenn (aðal- og varamenn), sem ekki eru jafnframt formenn aðildarfélaganna eða deilda sambandanna fara með eitt atkvæði hver sem og formaður ASÍ-UL.“ Þá segir í 5. mgr. 29. gr.:

„Formaður ASÍ-UL á seturétt formannafundum ASÍ með fullum réttindum.“

Af framanskráðu má vera ljóst að það er ekki ætlunin að einskorða atkvæðaréttinn við þá formenn sem sækja fundinn, en ekki aðra svo sem varaformenn sem sækja fundinn í þeirra stað, formann ASÍ-UL eða miðstjórnarmenn. Í því ljósi er lagt til að orðið „formanna“ verði fellt út úr 2. mgr. 39. gr.

6. Breytt reglugerð fyrir starfsemi skrifstofu ASÍ

Lagt er til að reglugerð fyrir starfsemi skrifstofu ASÍ verði svohljóðandi (breytingar undirstrikaðar og yfirstrikaðar):

Reglugerð fyrir starfsemi skrifstofu ASÍ

1. gr.

Skrifstofa Alþýðusambands Íslands skal undirbúa og hrinda í framkvæmd ákvörðunum ~~sambandsþingaársfunda~~ ASÍ og kjörinnar forystu sambandsins, miðstjórnar og forseta.

2. gr.

Miðstjórn samþykkir starfs- og fjárhagsáætlun fyrir skrifstofu ASÍ fyrir hvert starfsár.

Miðstjórn skipar starfsnefndir sem vinna með skrifstofunni að undirbúningi og framkvæmd stefnu Alþýðusambands Íslands á milli ~~sambandsþingaársfunda~~. Miðstjórn skipar fulltrúa úr sínum hópi til starfa með nefndunum í samræmi við nánari reglur sem miðstjórn setur.

Við skipan í nefndir og ráðningu starfsmanna á skrifstofu skal leitast við að hlutdeild karla og kvenna verði sem jöfnust.

3. gr.

Forseti er fulltrúi miðstjórnar á skrifstofu ASÍ og starfar í umboði hennar.

Varaforseti er staðgengill forseta.

4. gr.

Stjórnun á daglegri starfsemi skrifstofu ASÍ skal vera í höndum forseta og framkvæmdastjóra í umboði miðstjórnar.


Forseti kemur fram fyrir hönd Alþýðusambandsins innan og utan hreyfingarinnar í stærri málum.

Framkvæmdastjóri ber ábyrgð á daglegri starfsemi skrifstofunnar sem byggir á starfs- og fjárhagsáætlun sem samþykkt er af miðstjórn.

5. gr.

Ramminn fyrir skipulag starfsemi skrifstofu ASÍ skal vera með þeim hætti sem sýnt er á eftirfarandi skipuriti.

Skipurit skrifstofu ASÍ




6. gr.

Miðstjórn setur nánari reglur um skipulag og starfsemi skrifstofu ASÍ.

Þannig samþykkt með áorðnum breytingum á þingi ASÍ 2012.

Greinargerð:

Breytingarnar sem lagðar eru til eru tvíþættar. Annars vegar kemur „sambandsþinga“, þar sem nú stendur „ársfunda“. Hins vegar er lagt til nýtt skipurit sbr. 5. gr. í stað þess sem er í núgildandi reglugerð:



Nýtt skipurit skv. tillögunni endurspeglar mun betur starfsemina á skrifstofu ASÍ eins og hún hefur þróast, en það eldra.

Í samræmi við það sem segir í greinargerð með tillögu að breytingu á 19. gr. laga ASÍ verður tillagan kynnt á sambandsþinginu og þingfulltrúum gefið tækifæri til að taka afstöðu til hennar óháð því hvor breytingin á 19. gr. verði samþykkt.

7. Breytt reglugerð fyrir Listasafn ASÍ

Lagt er til að reglugerð fyrir Listasafn ASÍ verði svohljóðandi (breytingar undirstrikaðar og yfirstrikaðar):

Reglugerð fyrir Listasafn ASÍ

1. grein

Safnið heitir Listasafn Alþýðusambands Íslands (Listasafn ASÍ). Safnið er eign Alþýðusambands Íslands og fer miðstjórn ASÍ með yfirstjórn þess.

2. grein

~~Safnið er eign Alþýðusambands Íslands.~~ Safnið er stofnað samkvæmt ósk og að frumkvæði Ragnars Jónssonar forstjóra til minningar um Erlend Guðmundsson í Unuhúsi. ~~Miðstjórn ASÍ fer með yfirstjórn þess.~~

3. grein

Aðalhlutverk safnsins skal vera

- a) að varðveita og hafa til sýnis fyrir almenning listaverk þau, sem Ragnar Jónsson gaf ASÍ til eignar hinn 17. júní 1961 svo og önnur listaverk, safnið á og kann að eignast
- b) koma íslenskri myndlist á framfæri við almenning
- c) reka sýningarsal og skylda starfsemi.

Safnið skal í hvítvetna stuðla að því að íslensk myndlist nái til almennings með sýningum sem víðast og er heimilt að eiga samvinnu við aðra aðila í því sambandi.

Safnið starfar samkvæmt gildandi safnalögum og fylgir siðareglum ICOM, Alþjóðaráðs safna, International Council of Museums.

4. grein

Starfsfé safnsins eru skatttekjur frá verkalýðsfélögum innan ASÍ eins og þær eru ákveðnar í lögum ASÍ, framlög til safnsins af hálfu hins opinbera og eigin sjálfsafletekjur.

Allur arður af starfseminni rennur til safnsins sjálfs.

Reikningar safnsins skulu gerðir upp árlega miðað við almanaksárið og endurskoðaðir af kjörnum endurskoðendum ASÍ og löggiltum endurskoðanda þess.

Þeir skulu ásamt fjárhagsáætlun næsta árs lagðir fyrir miðstjórn ~~og ársfund~~ ASÍ. Ársreikningarnir skulu lagðir fyrir sambandsþing ASÍ til fullnaðarafgreiðslu.

5. grein

Daglega stjórn safnsins í umboði miðstjórnar annast rekstrarstjórn. Hún skal skipuð þrem mönnum, sem miðstjórn kýs til tveggja ára í senn.

Miðstjórn ræður forstöðumann safnsins. Rekstrarstjórn hefur umsjón með daglegum rekstri og ber ábyrgð á fjármálum þess gagnvart miðstjórn og tekur endanlegar ákvarðanir í umboði hennar um allan rekstur safnsins. Fyrir lok nóvember ár hvert skal rekstrarstjórn leggja nákvæma rekstraráætlun fyrir miðstjórn sem hún skal afgreiða.

Allar ákvarðanir, sem fela í sér miklar breytingar á starfsemi safnsins, skulu þó bornar undir miðstjórn til samþykktar eða synjunar.

6. grein

Við safnið skal starfa þriggja manna listráð. Forstöðumaður safnsins skal eiga sæti í ráðinu og vera formaður þess. Auk þess skipar miðstjórn tvo listfræðinga til setu í ráðinu til tveggja ára í senn.

Miðstjórn ASÍ skal ákveða þóknun listfræðinganna fyrir setu í ráðinu.

Listráðið skal vera rekstrarstjórn og miðstjórn til ráðuneytis um allt sem lýtur að listfræðilegum málum. Allar umsóknir um afnot af sýningarsal safnsins skulu lagðar fyrir listráðið. Þá skal listráðið fjalla um sýningar, sem efnt er til á vegum safnsins hvort sem er í sýningarsal þess eða annars staðar. Ef til greina kemur að safnið þiggi listaverk að gjöf eða kaupi listaverk skal slíkt lagt fyrir listráðið.

7. grein

Safnið skal starfrækja fræðslu- og kynningarsýningar um íslenska myndlist utan safnsins, á vinnustöðum, í húsakynnum verkalýðsfélaga eða opinberra stofnana.

Rekstrarstjórn skal ákveða gjaldskrá fyrir þessa þjónustu.

8. grein

Komi til þess að safnið verði lagt niður skal safnkosturinn renna til sambærilegrar stofnunar.

Breytingar á reglugerð þessari verða aðeins gerðar af ársfundi Alþýðusambands Íslands

9. grein

Breytingar á reglugerð þessari verða aðeins gerðar af þingi Alþýðusambands Íslands og taka þær gildi þegar við samþykkt.

Þannig samþykkt með áorðnum breytingum á þingi ASÍ 2012. Reglugerð þessi öðlast þegar gildi.

Greinargerð:

Breytingarnar sem lagðar eru til á reglugerðinni eru tvíþættar. Annars vegar eru lagðar til smávægilegar breytingar varðandi skipan texta og vegna breytingarinnar úr ársfundum í sambandsþing. Hins vegar eru lagðar til efnisbreytingar í 3., 4. og 8. gr. til að mæta kröfum sem gerðar eru af Safnasjóði vegna styrkveitinga úr sjóðnum. Þessar breytingar eru jafnframt taldar eðlilegar í ljósi stöðu og starfsemi Listasafns ASÍ.